

翁

山

詩

外

番禺

屈大均

撰

茗南

凌鳳翔

訂

七言古二

追荅王學士廬山篇見贈之作

我昔廬山尋瀑布香爐峯上披烟霧白雲無事早
知還欲共淵明奮高步淵明醉石橫溪邊九疊屏
風三疊泉飲酒正憐重九日聞鐘忽悟遠公禪吾
心皎皎如秋月照映寒潭無可說何妨變化若浮
雲自有光輝含積雪沙門束教非高士吾今況尚
爲人子養母宜畊十畝田求人欲著三朝史簡君
舊贈廬山篇廬山回首淚潺湲遺民此日成通隱

嘯傲王侯亦偶然

聽琴歌

匡廬瀑布三千尺飛入琴中如霹靂蘇門仙者聽
無聲一任崩雲兼裂石嶧陽桐樹爾何求不遇簫
韶返故丘明月從來不妄照孤雲何事亦羣遊

錦石歌爲梁芝五作

匹夫守志如磐石采山飲河聊自適五色文章世
不憐散作金膏和水碧梁芝拾得滿數斗云自銅
陵大江口他年持獻女媧來西北天傾復何有

題伍子胥傳贈友

丈夫忠孝難兩立此身一死真可惜雪恥當爲伍

子胥歸仇莫作徐元直鹿生於野命繫庖時危那
得適樂郊干將大阿不自握爲人所戮非英豪君
今何爲戀兒曹及時建鉞擁旌旄騎虎之勢不可
下負恩人是報恩者

題衛叔卿博臺

昭王舊作鈎梯處武帝嘗求博戲人羽蓋雲車何
婀娜花臺石笋復嶙峋強梁自貴欲相臣何足語
之大道真紫芝老父曾逃漢飛兔先生亦卻秦紫
霧濛濛絕壑裏閒持六箸對天神

玉女峯觀洗頭盆作

東峯俯削一高臺玉女嘗乘白馬來玉盆潛通黃

河水鬢髮沐罷光徘徊我來日月蕩精魄飛蓬白
愧無膏澤黃陵昔戀湘君祠太華今憐玉女宅聖
賢發憤詩三百風雅洋洋多好色公子應知憔悴
人三閭非是荒洛客

題王山史獨鶴亭

仙人騏驎是胎禽千歲丹砂入頂深聞爾浮丘能
相鶴孤飛忽至華山陰華山三峯削青天白帝金
精育大賢黃河萬里入胸臆文章一瀉如雲烟我
本羅浮五色鳥化爲仙人出炎嶠狂歌不逐衰鳳
遊高舉時蒙斥鷃諂聞君好鶴鶴亭居九臯清唳
爲君娛攜持杯杓來相就驂駕煙霞遂共驅共驅

直向華山巔鶴兮起舞何翩翩衣裳皎若玉井蓮
何殊玉女臨樽前

飲王氏湫園醉賦

華山谷口雲茫茫尋君臺館玉泉傍閒揮玉麈論
秋水莊襟老帶何清狂朝邑美人善歌舞荊州處
士能壺觴飛揚且任神龍性溫柔何羨白雲鄉白
雲變化何時息人生壽命有時極努力讀書與好
色明星玉女日侍側

丙午夏日將同李天生之雁門道過蒲城飲
米侍御園亭卽事有賦

蒲城六月火雲高行人飛鞵尋東臯大夫射雉有

遺處臺榭陰陰風雨聚金粟堆南問二陵堯山谷
口迷千樹主人驄馬早歸來救賜芙蓉對客開前
席少年籌漢罷上林高士望京廻驚鴻流雪慰摧
頽醉揮漫水入金杯同心藕使冰盤滿金蒂花教
玉管催織女多情銀漢度匏瓜無匹心相如矢志
聊爲聲色荒求仁不被神仙誤歌長燭短夜無多
明朝秦晉阻黃河鴈門深入胡天雪回首西方憶
綺羅

古丈夫洞草堂歌

并序

歲丙午之春予遊西嶽於北斗峯得二洞一曰
古丈夫洞一曰毛女洞心甚喜之將結艸堂於

其間以爲峯山自青柯坪北至二峯其壁之穿而爲坎者可容趾二分爲領者容指二分用指之力嘗多於趾歷千尺峽百尺峽老君犁溝仙人砭蒼龍嶺諸處雖絕峻峭然皆遊人必經之路而此二洞在嶽西絕壁間可望而不可卽遊人必不肯枉道以問焉吾結草堂於其間是天之所私以與我也且是洞又曾爲古丈夫毛女所棲夫古丈夫秦之賢者以始呈滅二周之故遜入西嶽而毛女玉姜爲秦宮人亦以秦無道負琴入西嶽與古丈夫服枯葉飲泉以老吾之所遭庶幾古丈夫嗒而吾妻秦女也亦慕高隱

今結草堂於二洞與吾妻踐古丈夫毛女之迹則斯二洞也前有古丈夫毛女後有吾夫若婦天之生斯二洞爲不虛使志西嶽者采之其可傳何如也且吾昔者爲西嶽詩百韻秦人李天生見而悅焉持以爲寔修吾故得吾妻夫昔以西嶽得妻今以妻還配嶽西嶽之大有造於予安可忘哉於是予更字曰舉夫而吾妻曰舉姜草堂旣成舉夫種古丈夫之栢栢舉姜彈毛女之琴人望之咸以爲仙舉夫笑曰否否乃爲草堂之歌曰

丈夫非仙人毛女亦高士相攜向白雲欲學采薇

子天生兩洞如鴛鴦西臨太華東首陽女蘿飛花
蔽洞口雙棲人在洞中央草堂之中何所望有美
一人持玉漿巨靈掌上石樓長水簾捲起見明粧
草堂之中何所服石髓金精滿巖谷古栢千歲吐
奇光夜如荷花晝牛目

田三丈席上歌

今夕何夕醉潁陽王翦祠前堪斷腸美人一雙紫
鴛鴦願隨長風共翔翔秦箏慷慨西氣溢燕歌變
轉南魂失佳麗須歸楚些人神仙肯作湘纍匹往
日人傳好色名南求交趾東遼城交州美人珠鬢
送遼陽美人貂裘迎只今殺初情難已溫其如玉

懶君子羽釵旣呈遠遊冠牙牀敢展合歡被

雁門送客

君在雁門北我在雁門南雁門八月紛霜雪何事
征夫繫玉驂桑乾水遶長城遠句注山含秋色晚
塞女吹殘籥策聲舉杯勸爾江南返江南春色在
君家早將妻子別龍沙樓臺更向秦淮曲日對天
桃幾樹花

送孫丈歸黃山

君何不向黃山歸君家有枯大十圍枯外一天雲
氣濕枯間百道瀑泉飛我思三十六翠屏復愛枯
今長青青安得隨君入杳冥君爲兔絲我茯苓相

與枯兮至千齡

去年東嶽兼西嶽來往真如天際雲今日黃山遊
不得三十六峯空待君君歸好向湯泉浴會見骨
青而髓綠容成教以駐年方服食虛無坐紫床道
成相與隨軒皇

烏蠻大灘謁伏波將軍祠代景大夫作

亂石截流數十里大石生人小石死水小不險水
大險穿舟最患石齒齒水石喧闐闐不開水崩石
裂聲如雷兩岸青峯隨帆轉一灘白鳥逐篙廻灘
名烏蠻最險惡伏波往日曾疏鑿功同神禹合俎
豆有廟巍巍鎮甌駱甌駱至今遵約束歲時廟下

祭旗纛祠中銅鼓鑄馬餘銀釵叩擊蠻風俗蒼冷
雙女僭爲王將軍破賊威揚揚雙植金標臨漲海
七腰銀艾到炎荒神靈終古槎江在巨石依然排
壁壘湍流最怒狀軍聲勢逐牂牁東入海兩江黔
鬱此朝宗我溯驚濤欲上邕千篙日與雷霆戰萬
馬橫當水石衝調兵東征若不速番禺九郡未恢
復□主徒希馬伏波委身未遇□文叔將軍際會
本非常我憶重興二十霜掃蕩南交待□命邀君
靈寵早還鄉

秋夜恭懷先業師贈兵部尚書巖野陳先生

並寄世兄恭尹

戊子

驚風吹折扶桑柯白日慘慘沉滄波無數哀猿啼
不止美人回首淚滂沱曾將九辯弔沅澧長夜悠
悠雪千里招魂何處告巫陽被髮空然呼上帝憶
昔從師粵秀峯授書不與經師同押闔陰謀傳鬼
谷支離絕技學屠龍天下山川誇聚米壯夫詞賦
薄雕蟲小子生年方十五意氣飛騰思食虎噴玉
纔蒙伯樂看追風便向天墀舞天墀春暖彩雲開
帝乘玉輦陪京來萬里江清鳩鵲觀六朝花發鳳
凰臺夫子憂時雙鬢白頻獻重興三十策不從魏
絳擬和戎遂與賈生爲逐客唾壺擊破愁心多君
父仇讐將柰何長纓不許終軍請黃鶴誰令翁主

歌九鼎茫茫沉泗水六龍冉冉出蓬婆奔走中原
殊未已孤臣淚作黃河水東渡徒勞艤棹心南巡
未雪膠舟恥巫咸終合作波臣智伯何曾知國士
國士縱橫不可當平生袴下多侯王但教死去圖
麟閣不願生還挂鵲章一呼市井千人戰廣州城
下兵如電半月連營虎豹屯六花奇陣鴛鴦變先
鋒已拔骨都旗後勁全消當戶箭豈意軍無三日
糧馬銜枯骨士金瘡頻殺美人來饗士美人花映
蛾眉長天心何故憐子國步迤邐今若此長留
正氣爲山河空有神光炤箕尾慚予亾命奔天涯
誤擲千金博浪沙途窮不得尺寸柄髡鉗爲奴賣

朱家朱家豪俠傾四澗堂前賓客如雲會卜夜聊
爲歌舞歡探囊尚有孫吳在何秀難聽長笛哀伯
牙欲把鳴琴碎鳴琴碎兮我心苦西山采薇將何
補翠華縹緲蒼梧烟玉佩飄零洞庭雨楓葉蕭蕭
二女祠蘆中窮士寒無衣白頭漁父滄浪去麥飯
壺漿欲待誰

長歌爲玉龍子壽

蒲桃美酒金叵羅銀盤堆炙高嵯峨請君酣飲當
秋月世上功名柰爾何月出涼州雪氣湧琵琶羌
笛閒相弄衛霍鷹揚自有時荆專狗盜終何用我
有純鈎一雌雄三金吐燄芙蓉同紛紛虎豹不足

刺出天入地如飈風自從攙搶犯帝闕四瀆波翻
天柱折包胥慟哭無人聞勾踐深冤難自雪因之
遊心八陣盤奇正相生環無端龍蛇變化在掌握
全師一擲非所安狐裘蒙茸垂錦帶遨遊東走邯
鄲外傾家交結高門從燕姬酒樓爭樗蒲千山殺
氣漁陽慘五夜笳聲大帳孤逢君沙漠至意氣相
歡呼長兄張子房小弟周亞夫肝腸剖出如白日
太山一諾堪捐軀歲月滔滔若流水忽別江南數
千里天心不肯厭□孛世態那能留國士我如梅
福棗妻子蓬頭垢面棲吳市桃花春滿會稽山鼓
棹南湖蒼翠間憑誰寄語鴟夷子載取西施月下

還西施還兮一攜手逢君忽在胥山口衣淚猶霑
馬汗紅風流不滅虬髯秀莫嫌三十猶沉淪尺門
曾有抱關人才似文淵不惜老美如曲逆寧長貧
看花且乘青雀舫朝斗且戴華陽巾懸黎追琢始
成器豫章鬱結方有神天生我技能穿楊時來三
箭誰能當漢賊絲來不兩立男兒豈必封侯王甌
中況有丹砂在只須功成便翱翔

四孝烈

有序

歲之甲午西寧王帥師攻新會城閉八閱月糧
盡守將屠居人以食有莫氏者諸生林應維之
妻姑將就烹莫叩頭請代始得釋而莫死李氏

者兵欲食其夫哭拜曰吾夫五十無子請食我
兵殺之以首還其夫使葬焉梁氏女者其父諸
生學謙女年十一請代父亦死諸生吳師讓妻
黃氏亦代夫死是爲新會四孝烈

黑雲沉沉壓城隅城中食盡雀鼠無誰其死守右
骨都饑來贈人爲朝舖可憐窈窕三羅敷肌如水
雪顏如茶再拜乞克君庖廚解粧請代姑與夫妾
年尚少甘且脆姑與夫老肉不如請君先割妾膏
腴味香不負君刀及食之若厭厭願還妾頭願姑
老夫無子妾命敢躡躡有女年十餘緹縈亦不殊
哀求赴湯鑊保父千金軀保父千金軀泉下報章

渠無嫌女身小一飽只須與須與飽亦可章渠單
殺我天生嬌女身爲君供鼎俎

夢馬歌 有序

予友張金吾家珍少從其兄文烈公起義軍中
得良馬絕愛之騎之出戰摧鋒陷陣輒有奇功
馬死金吾哭之慟葬之於龍門山中庚寅廣州
失守金吾怏怏歸畊風雨之夕忽夢騎此馬酣
戰如曩時覺而爲詩吊焉屬予和之

張侯十六勇無敵錦衣玉貌烏孫識千金買得大
宛騶騎出沙場人辟易揮鞭曾躍三重河勢如天
邊紫電過羗兒萬箭射不得死生可託征蓬婆一

朝汗血用忽竭君恩難報徒嗚咽玉勒金羈委艸
萊龍髻鳳臆埋冰雪英雄無命自古傷駑駘壽比
騏驎長嗟子功名終不偶歸耕海上淚浪浪髀裏
肉生悲老大虛擬封侯如拾芥霸陵醉尉時相侵
榆次博徒嘗見賣秋宵木葉飄寒庭氈衣肉酪心
不平彎弓欲射天山月拔劍難斬被頭星長夜悠
悠何時旦君父仇讐不可緩夢中忽在白龍堆追
風千里飛龍媒細看乃是舊乘駿玉花朱鬣氣雄
哉初交衝破沮渠障橫行踏倒赫連臺雙瞳黃金
蹄碧玉閉向長城窟中浴圍人乃是諸降王日餵
焉支花百束陰風吹帳雪紛紛魂去魂來瀚海濱

一死葬黃沙猶戀主生爲紅粉更依君
絲來良驥感一顧赤兔當年殉呂布
願君努力更臨戎厲鬼還能相夾輔

義象行

將軍來從夜郎天萬里旌旗橫海邊
左右名王膏玉斧西南君長執金鞭
因之問罪尉佗國兵勝絲來驕氣作
美女聊爲歌舞歡謀臣自有孫吳畧
營中何物高嵯峨十四雄象相蕩摩
久向滇池習鬪戰憑之觸敵計良善
蠻奴一下紫金鈎蹴踏沙場山嶽轉
豈意中宵敵潰圍不誅莊賈損軍威
至尊方有平城厄丞相頻從瀘水歸
誰言不敗絲天幸

自是無功因數奇神龍失水困螻蟻往日風雷嗟
已矣梅鎔關上陣雲崩伏波祠前鼓聲死象兮盡
入橐駝羣口銜首菑淚紛紛蕃雛騎向天山道漢
使愁看黑水濱中間一象獨不馴天子曾封爲將
軍勢每奔騰蹂萬馬聲如啞廢千人曾擊長沙
城闕碎如虎如熊誰不愛皇天不欲興神州致使
六軍齊受害繇來犬馬思報主況乃瑤光是降汝
曾被雷驚花入牙御前妙舞如鸞翥唐朝不拜赤
心兒今日寧降老上師幾夜偷營多傷殺田單火
牛寧足奇堪嗟巨礮爭叢擊戰塲孤力終難支皮
可寢兮肉可食死爲鬼雄遊八極從來驥也稱其

德人不如獸徒千億

登秦望山寄謝廬山無可大師

秋風忽起飄井桐白鳳西飛紫鳳東何處思君最
淒斷流泉潺湲秦望峯秦望高兮烟靄重我持明
月炤鴻濛雲間夏后金書在采下秦皇玉輦空遙
望廬山倚南斗三石梁邊君隱久陰符寶劍與何
人玉塵青蓮應在手幾宵乘月彈瑤琴寄我瀟湘
帝子唵梅花亂落雲門寺經歲相思未嗣音此日
登高眺東粲日出天台佳氣在黃屋將浮碣石來
紫芝尚向商山采采紫芝兮使心愁功名讓與屠
沽流仙人肌體如冰雪姑射山中自可留

客山陰贈二祁子

君家樓閣鑑湖邊，楊柳千條春色妍。
疎牖朝開射的雪，空簾暮捲香爐烟。
閒擁牙籤披萬卷，小謝風流詩更善。
可憐初日吐芙蓉，更有澄江飛白練。
我從羅浮萬里來，逢君文采一徘徊。
天上雪花那有蒂，雲中玉鏡不安臺。
相留暫向祇園住，正是中丞殉節處。
碧水含秋侶，汨羅黃金布地同。
玄度櫻桃開遍畫欄杆，揮塵鳴琴興未殘。
半山每答猿公嘯，千仞將聯鳳鳥翰。
鳳鳥高飛何所止，金陵宮闕五雲起。
一鳴素水降真人，再鳴留侯遇采子。

送方瞳子

戊子

家本羅浮上仙人日往還就中乞漏令侶爾芙蓉
顏芙蓉顏兮誰不悅朝如丹霞暮如雪弄玉來教
紫鳳簫靈娥炤日瑤臺月月出瑤臺柰樂何忽乘
天馬超天河遨遊每共東方朔功業聊爲馬伏波
千金買得魚腸劍七寶裝成獅子花天下侯王猶
草澤江東子弟已干戈問君望氣意如何五色龍
文嵩雒多我作班彪王命諭羣雄不敢思并吞赤
眉必有長安敗王莽終遭宣室焚自古帝王盡天
授雲臺諸將羅星宿子房本是赤余流漢家乃繼
唐堯後春日張筵戲馬臺千枝芍藥送春來燕姬
競作蓮花旋羗笛齊吹阿鞞迴慘淡風雲歸沛上

蒼茫淮潞入金杯看君醉後揮鞭去颯颯龍沙萬里開

遊會稽山懷古金詠陶生見贈

己丑

葳蕤紫鸞鳥口銜扶桑花颯颯朝禹穴雙翼蔽天涯
禹穴龍蔥雲五彩千峯竹箭連滄潞玉簡金書不可尋
香爐天柱依然在爲刑白馬登天壇冉冉龍輿望不還
四岳衣冠歸鬱水諸侯玉帛待塗山塗山南去陽明洞
酌酒秦皇三石甕白雀唵笙射的來仙人蕩楫樵風送
樵風颯颯鑄溪濱當年此地成純鈞雷公爲鼓陰陽炭
天帝來看龍虎文爛如列星羅太乙皎若芙蓉含夜月
登高山兮臨深

淵一麾敵國皆流血嗟予亦是風胡流心與天通
事遠遊君王未雪夫椒恥臣子難寬范蠡謀玩弄
仇讐股掌上六千君子爲吾養繇來舉事隨天時
陰謀逆德蹈危機天地相參功乃就援抱提鼓莫
遲遲遲遲兮柰何衝風忽起澣揚波逢君玄夷蒼
水使授受天書鳥跡多承呂文璜覆盤石昔年宛
委山中得深藏不使鬼神知默誦嘗將符識測符
讖今歸大憤人雲臺二十八星陳我着羊裘漁大
澤君攀鳳翼上天津天津迢遙接具茨牧童七歲
爲軒師天授英雄非偶爾何減黃公遇下邳

舟上西江值大水有作

六月滇黔水大來端州城門不敢開左右雙江爭
一口白波倒捲失崧臺咽喉最苦羚羊小水花四
飛如白鳥洪濤鼓舞不因風一出峽門成浩淼此
水發源自夜郎萬里來入祝融江南天一瀆亦無
愧勢與岷江爭短長春來一雨成黃濁八斗淤泥
那可濯炎方水土此難嘗生長蠻中殊不覺我行
正溯牂牁西津路微茫咫尺迷牽舟欲上木棉樹
走馬不見桃花堤榕葉陰陰餘片地芭蕉土布來
金利漁父鱗魚尺許長買來且作風前醉
峽口片雲時啓閉風雷更助建瓴勢水頭十丈似
黃雲兩岬崩崖苦相制牽舟直上望夫臺萬壑千

巖往復迴石棧如絲縈絕頂飛梯上下愁蒼苔瀕
黔至此水始放河伯未見奔騰狀萬里苴蘭赴海
來炎風吹盡無煙瘴風俗家家種橘田淘金採石
峽門邊多魚正喜西江漲婦女相將日數錢

上峽

水如奔箭穿霞壁舟與浪花相拒敵千巖萬壑勢
將崩一石中流猶盪擊風挾驚濤似颶來斜吹一
半斷虹開湖向北江猶可上西江從未有湖迴北
江勢比西江緩水性西江尤勁悍時時一口似龍
門萬里飛流東欲斷牂牁至此尾闈同到海猶須
兩日功傾瀉不教元氣盡故爲三峽呂梁中

蕉布行

芭蕉有絲猶可績績成似葛分絺綌女手纖纖良
苦殊餘紅更作龍鬚席蠻方婦女多勤劬手爪可
憐天下無花練白越細無比終歲一匹衣其夫竹
與芙蓉亦爲布蟬翼霏霏若煙霧入筒一端重數
銖拔釵先買芭蕉樹花鍼挑出似游絲八熟珍蠶
織每遲增城女葛人皆重廣利娘蕉獨不知

查君來自黔中贈之

憐君萬里事孤征艱難來自黔陽城黔陽乃是煙
霧海天無三日能乾晴雨師最好黔陽地霖霖濛
濛豈天意三年未洗戰場紅紅滿黔陽皆血淚嗷

啾新鬼多王侯可憐白骨成山丘英雄豈合建大
義殺身自古因春秋水澗火熱天所喜湯武之師
皆逆理君臣一炬謝生靈赤縣神州終已矣君向
黔陽弔戰場仲家黑白邀壺觴腐肉之中相飲食
烏鳶往往爭肝腸爭肝腸中有馨香是國殤生降
差比都尉強君行莫與別河梁

贈周文學

君如瓊樹方敷榮又似玉壺冰至清三歲珊瑚色
盡赤五年孔雀尾全成年少周郎古所羨况復聰
明是才彥不工顧曲但讀書文章已見雲霞變幽
軒列植多名葩美盎滋蘭盡發芽香煎水熟風微

起琴寫泉聲月正華書多不用徒漁獵至道從來
少枝葉古聖精微在六經神明一片宜相接

七星巖磨厓題名歌

七星化作七芙蓉斗柄乃是玉屏峰中有夾天千
尺峽天開一罅煙重重振策飛厓同我友摩挲怪
石雲濡手心憐絕壁勢爭雄欲得蛟螭字如斗君
也今之顧入分石經瘦勁汝其倫墨氣淋漓山鬼
泣無端破我蒼苔痕白石肌膚如玉雪磨礪欲出
巨靈血數聲斧外何清越石工一字一螺金丁丁
日夕愁穿穴石火射人光不寒爲君留得水雪肝
姓名他日誰不朽置身且學此峰巒

伏波射潮歌

廉州海中常有浪三口連珠而起聲若雷轟名
三口浪相傳舊有九口馬伏波射潮滅其六云
后羿射日落其九伏波射潮滅六口海水至今不
敢驕隨月盈虛少沓潮流向東西各半月新潮旣
長舊潮消將軍天命治南海萬古波濤精爽在前
驅海若後波臣民免爲魚仗真宰

端州訪研歌和諸公

古之著書人豈必端州研黃帝陰符有作時墨池
只用瓊瑤片黃帝得玉一經治爲墨池篆曰帝鴻氏之研君今采研思
氤氳不踏青天割紫雲身入東西雙洞口九淵始

得青花文水巖之石水精子帶血羊肝純作紫火
捺金錢朶朶圓白凝蕉葉爲肌理年來巖底采無
餘鬼斧神工多得髓紛紛散入富豪家什襲文綾
與絳紗未雨那知泉有本長乾爭見墨生花綠塵
半與圖書積安得松烟飽朝夕真氣徒舍天一溪
空光未有雲霞迹琉璃作匣枉稱珍終日隨身詎
有人風雅紛葩思賦客春秋羽翼憶經神君今欲
采珪璋質尺寸微瑕皆勿失天雷淳樸與遺人鬼
瞰高明悲巨室石工欺汝只織毫翡翠朱砂總未
高鸛鶴眼多堪抵鵲梅花坑好可磨刀神物繇來
知者寡相錯剛柔方大雅不得精華日月中文明

安足成天下爲君鉤索尚茫然應有精誠格上天
成璧成珪憑帝賚天然不必問方圓

老樹歌爲蔣少叅壽

少叅堂側有老樹似榕非榕榕所寓葉葉含苞如
木筆葉開忽似花爭吐花亦非花花不如紅淺綠
淡帶膏露千萬根鬚作一身虎倒龍顛應有故我
公構宇輪囷下日見柯條出煙霧公餘一日三摩
掌時遣詞人競題賦擁腫不知大幾抱朔雪炎霜
自朝暮青牛變化已多年白鶴巢棲寧有數尉佗
城中古木少除却菩提應獨步越人以此爲甘棠
一葉一枝孺子慕公之先公所根本南海一株磐

石固百年父老已湯沐萬古神靈定呵護霜威尚
帶西臺柏匠石森然不敢顧五嶺憑茲作梁棟望
似丘山陰四布吐納精華日影中元氣茫茫各奔
赴膏流金玉總堪餌腹有文章長不蠹天南奇樹
罕人知木綿千尺虛當路楨幹因君益大春剪拜
恐爲雷雨怒

公尊人南陵先生嘗爲南海令
林有菩提樹植白蕭梁公以御史

出叅
藩

古銅蟾蜍歌

古銅金質久已化血花繡蝕三泉下何人鑄此月
中物持作薰爐噴蘭麝月中與兔爲陰陽三足婆
娑桂樹旁日中之鳥亦三足一東一西遙相當太

陰呼翬生潮水仙人師爾服氣方生長瑤臺明鏡
裏精華不待取扶桑漢宮以此爲神器剪取沉穢
消夢寐紅顏不少嫦娥寡相伴蟾蜍度年歲摩挲
銅色何斑斑看丹如綠有無間雙煙自可通瑤圃
一氣何須假博山軒鼎餘銅龍不愛神工拾得虛
無外無香亦復雨氤氳有火莫教雲靄鬱時時一
縷生空中太古長留一點紅縱是灰寒終不滅神
靈看與蜃樓同

賦得石琴送陳健夫往零陵

端州白石天下稀聲含宮商人不知斲就瑤琴長
四尺輕如一片番流離石音最是難調者碧玉老

人能大雅絲來太古本無絃不是希聲知者寡無
 絃吾欲並無琴琴向高山流水尋天籟元從人籟
 出非君誰識此元音君今欲向瀟湘去此是重華
 揮手處五絃一一在天風二女雙雙出煙雨詩篇
 投向洞庭波山鬼篁中答嘯歌幽蘭積雪頻相寄
 慰我相思秋夢多白沙先生自號碧玉老人密夢
神人聽其琴謂石音難調子今
能調如是他日其必得道自沙而更自
稱曰石齋今石琴尚在碧玉樓中也
 梅花泉杭州西湖溪有泉漣出作
梅花形名曰梅花泉
 梅花泉泉作梅花朵朵圓五出有時還六出雪花
 一半相洄漩泉出梅花萬樹裏天一所生無彼此
 在天為雪地為泉欲作梅花無不似武陵溪口桃

花時泉作桃花人不知紅紅白白因花性散作煙
波不自持君今結宇西溪好萬樹梅花日相抱泉
裏梅花更不窮流出人間豈浮藻一杯一朵月精
華知爾枯喬自難老

畱石行奉呈黃參軍

英州之石甲天下——峰巒削成者尺寸皆作一
巖洞一卷已自成西華使君作宦來炎方十四芙
蓉案牘旁嵌空鬪竦分韶石大小相疊讀書床扁
舟不肯載歸去畱我艸堂使箕踞奇雲所變勢巉
巖就中大者如淫預昔人高致有陸績雖清亦愛
鬱林石君今石乃似沉香十四芙蓉同一擲沉香

長在沉香浦英石長與翁山伍行者爲岱坐爲嵩
乳竇玲瓏出烟雨君之風流在此間蒼翠依依是
玉顏殷勤洗濯去苔蘚朝夕再拜那能閒

韓憲使見貽二白鵬賦以答之

使君持憲白鵬國白鵬一一生顏色相貽雄白與
雌朱教我烟霄恣胸臆山雞孔雀滿金錢閒客衣
裳似雪鮮明朝放向羅浮去應解啣花舊主前

一名
閒客

送吳少叅返歷陽

天作天門夾大江君邊蒼翠濕秋牕西梁煙接東
梁雨看殺芙蓉第一雙蘭橈曾繫君楊柳鶯向春

人催飲酒沿月頻過采石磯乘流直出鮓魚口江
北煙花是歷陽君歸爲樂正多方謝公陶寫憑金
管太白風流在玉觴養壽豈須紫芝艸忘情自令
朱顏好文章已可得長生况有醉鄉縱懷抱

送楊別駕返雲間

雲間曾至李鷹家白白鱸魚出淺沙四月紫萼復
肥美盤中不數龍孫芽君自九峰至南越梅花何
似泖湖月三年佐郡傍臺關大庾之山嘗拄笏還
家且向吳淞居爲政心閒在讀書故人石父謂王
蒲衣
長思爾會有相思託鯉魚

李偉公贈我朱子綱目詩以答之

春秋之後有綱目有如日月光相逐月光元自日
光來紫陽一日三膏沐地義天經總在茲溫公書
法不會知背秦豈合誣周赧纂漢那堪獎魏丕昭
烈一隅元正統武侯六出本王師亂臣賊子不誅
滅黃初却在建安時筆削無過助兇逆褒貶乃自
行阿私牝雞亦可當尊位呂武紀年此何義英宗
忽使考仁宗父子可憐名實戾真是尼山一罪人
紫陽不出無天倫冠履一胡辨上下血氣自此知
尊親史中有經何精粹素王宗子真無墜此書君
乃肯相貽誦讀自今忘夜寐年來辭賦已無心早
歲春秋元有志書法只今在艸野一部成仁吾史

如壺曲柄長匏尊讓爾居中央巢父手間日摩弄
松枝掛處何清涼

羅浮探梅歌爲臧喟亭作

羅浮梅花天下聞千樹萬樹如白雲開時花似玉
杯大枝枝受命羅浮君么鳳一食三百朶綠萼檀
香畱與我君來先到梅花村重夢美人君不可四
百峰間開更開花從舊蒂作新胎今歲雪多添一
瓣去年霜少盡重臺玄墓西谿花百里可惜天寒
香似水炎天氣暖長氤氳生熟水沉作鬚藥不到
羅浮爭得知梅花自此長相思化爲蝴蝶車輪大
歲歲來攀太古枝

五十四歲自壽歌

西樵七十有二峰東樵四百三十二峰峰吾皆居
一年不覺年今五十四明年又復居西樵一年一
峰吹玉簫但教七十二峰遍便與仙人上紫霄

江山風月福人歌自壽

鐵崖老人髮穆穆行年八十猶宐男瓊華翠羽蛟
蝶扇柳枝桃葉芙蓉簪江山風月吾亦耽日飲美
酒能沉酣散花天女繞左右一朵一杯優鉢曇天
年得至九十九賦詩應餘十萬首年今六十紫髯
長先駐玉顏娛老母老母康侯王母同受茲介福
天長久

奉答張觀察枉顧沙亭村舍之作用韻

東海北海海之濱文王不作歸誰親太公漁釣奸
西伯美女奇物稱三人吁嗟文武師若此何如墨
胎二子仁不才佯狂居南瀆食薇顏色能如春東
方每笑首陽拙曾參亦譏黔婁貧持蔬槁死寧不
可有母白髮方九旬使君軒車忽相訪雞鳴犬吠
驚鄉鄰亥唐菜羹亦未設荷蓀黍飯乃自珍踰垣
閉戶豈中道禮尚往來吾當循威鳳有德貴能下
神龍之性期終馴使君吐哺向白屋芻蕘之智圖
諮詢庭前秋水澈白石屋後喬松矗蒼旻物物可
以代忠告豈必有言書諸紳騶忌鼓琴託諷諫斲

輪喻道偏如神知公相契在默識忘懷自此日以
真

自蒲澗至簾泉洞尋鄭仙鶴舒臺作

七月廿四廿三日廣人傾都東門出菖蒲澗中漱
寒泉共尋鄭公煉丹室傳聞此日鶴舒翼安期上
仙就仙職秦皇蒼蒼向煙霧東使少君求不得玉
鳥何年留阜亭蒲花紫茸含秋馨越人祈子每雙
乳高禱此地惟仙靈水簾半遮大巖口拾栢數株
老猿守錦幡爭答白花男珍果競懷紅粉婦仙人
屣跡履紛紛觸破苔痕生白雲生兒我欲生高士
似我迷花不事君

王不菴作臥龍松歌爲予壽詩以酬之

黃山山上多怪松半生石笋半芙蓉芙蓉石笋亦
松變有一不變爲臥龍龍本無形以神化真形往
往與松同龍之隱者但高臥人不見龍見髯翁髯
翁鱗甲多怒決柯如蒼銅枝屈鐵引根十丈始作
榦榦雖千年似萌蘖霹靂橫將偃蓋傾蛟螭爭向
輪困結夜光有火出空心日炙多膏流斷節一枝
一榦一尺蠖求信且復依巖穴山僧寫圖貽我看
王子作歌含淒咽尺寸得空自盤攬縱橫穿土苦
羈縻我我千尺乃無勢幸因奇醜免摧折五鬣短
短少波濤聲似風雷畜未泄苦心愛此一樹怪自

少摩挲至大耄蹒跚尚有尊足存支離乃是鬼神
設臃腫何須規矩中斧柯且喜薪蒸絕雖然久壑
非泥蟠撐出丹崖作遺子石破天驚自小時後凋
憑爾存孤孽本是軒皇昔所種手澤至今乍明滅
當年且戰且學仙霜根留得玄黃血灌溉頗用朱
砂泉滋潤微凝太古雪浮丘無力治拘攣容成有
意引寥沈黃山諸松此最古兒孫萬萬丹臺列臥
者天淵自高深立者棟梁久顛蹶君指此松爲予
壽意在不材能斲蠹蟻蟻頻容蝕茯苓藤蘿一任
爲瓜瓞裕黃落地成古苔松子滿天低可綴君在
黃山亦一松莫教化石存楫楸一松孤作老人峰

秦漢來封久不屑臥龍復有擾龍好繚繞數峰出
巖嶮一枒飛作天生橋一枒倒生更奇譎煩君添
作四枒圖置我枒間長用拙

黃山五枒歌

枒兮枒兮龍之宗龍不爲龍乃爲枒枒作女蘿纏
一石石爲枒困難成峰倒生下垂幾千仞枒頭生
在青芙蓉龍渴下飲髯拂水一者橫臥當石淙一
者破石石腹裂石爲之母胞胎重石無竅穴枒久
孕橫枝千載乃穿胸枒膠石漆日堅固枒身長大
石無縫石兮乃有枒爲子石生石養無土壅龍性
從來不見石石卽泥土恣所衝人間但見枒變怪

豈知是龍不可蹤

題西子祠

苧蘿村中祠西子蒼梧城外祠綠珠湔裙一派美
施水得似雙角井泉無子胥鴟夷浮江水夷光乃
亦浮五湖亡吳之罪亦足蔽與誅妲已皆良圖可
惜吳亡不自死下同紫玉在黃壚夫差得爾一相
殉魂魄至今娛姑蘇

苧蘿村祠西子爲土教其湔裙處稱美施水今有美施闢

細月歌

兒明洪年四歲時夜見太白形體大於羣星有
光閃爍以爲細月也予聞之失笑爲作細月歌
以示之

有天將軍名太白嘗配明月逐月魄小兒不識是
長庚喚作細月笑賓客青蓮小時月不識白玉之
盤向空擲謂瑤臺鏡亦不然鏡豈有輪大十尺太
白之星誠易知穿入月中苦蠻夷太白高兮中國
利金星但願出毋卑汝今夜夜拜太白朝拜啓明
起莫遲啓明多拜得聰慧長庚更與命長宜

烏江弔項王

力拔山兮天下雄氣蓋世兮乃無終王以天下兮
三讓不然漢高無大風一讓兮不殺沛公鴻門不
追至軍中始驅除兮終拱手禪授之德真重瞳再
讓兮不都關中天府捐棄咸陽宮故鄉彭城不忍

舍鴻溝爲界來相攻三讓兮不渡江東江東吳越
地未空八千子弟倘復起夫差句踐霸可同江濤
怒兮水倒立大野吹兮多落楓時不利兮騅一蹶
天之亾我命當窮死生與虞同一命蛾眉血兮濺
衣紅王多情兮不負季視季亦與虞兮同還定三
秦忽失約季負王兮季非忠不殺義帝季亦殺三
軍縞素欺愚蒙英雄豈必皆好信勢便逐利如轉
蓬三傑不言復讎事董公遮道計姦工吳芮不殺
王不服弑君之賊乃有躬義帝無後漢不立漢之
寡恩誠不聰英雄成敗兩不義誰言天授非人功
吁嗟誰言天授非人功

嘉禾歌爲王礎塵壽

嘉禾生在何地一莖嘉禾有八穗一穗有穀六十
四望如蘆荻一叢叢朱家巷口廿里中三百年來
草未墾此土發祥有真龍真龍昔向句容產黃氣
紫雲長鴻濛瓜瓞絲絲此根本民之初生沮漆同
嘉禾知是后稷穡不煩播種因天功子孫會有聖
人出嘉禾爲兆非年豐我從王君聞此兆如此嘉
禾古所少八穗乃是八純卦六十有四合大小易
爲日月兩大象相代爲明昏復曉一穗具卦六十
四造化有心殊易了持將八穗爲君壽數符五百
不先後名世卽同王者興周公嘉禾作應又

黃山僧述古畫黃山諸松見寄詩以酬之

大師將毋永嘉僧畫松往往松飛騰夢中吞龍知
幾百吐爲松樹有神馮狂來倒吸歛溪酒醉中鱗
甲出兩肘黃山諸松最奇怪禿筆掃來無不有此
圖十株皆逼真尺蠖盤迴苦不伸千態萬狀在枝
榦多橫少直爭輪困日揮雙管走奇鬼一爲生枝
一枯枿拂水藤纏夜叉臂凌霄花結靈鼠尾針苾
一一如鐵攢中有風雨驅驚湍陰森已過畢庶子
勁挺絕勝蔣長源大師畫手老無敵因我愛松費
筆力他時我向黃山行偃蓋株株應徧識會當再
拜臥龍松十旬坐臥當臥龍剪取生絹長一丈乞

師圖取歸南禺

畫史永嘉僧擇仁善畫松夢吞數百條龍遂臻神妙性嗜酒醉後取

拭鞞中濡墨灑壁明日少增修爲任枝枯枯者皆伏其神筆米元章云蔣長源作松身似夜叉臂一李成畫松葉取真松爲之如靈鼠尾大有生意時作凌霄花纏松亦佳

蓮

紅蓮安子白安藕白者香多紅者否蓮秧頻種春分前紅蓮持作白蓮偶枝頭向南葉易舒花比葉高一丈餘春分後種花苦短田田影裏含芙蓉年年種蓮不及早街頭買得數缸好吹香一夏喜風多朝朝一朵開懷抱

合歡木歌

合歡合葉不合花花合何如葉合好夜夜相交不

畏風令君獨忿長相保勸君多種合歡枝葉至黃
昏合不遲夜合合花那得似花有離時葉不離

山大丹歌

自是赭桐人不知山大丹名空陸離越王烽火開
千樹石氏珊瑚碎萬枝終年吐豔光相射不待燭
龍成不夜端陽日酷色逾鮮雖黃未肯先紅謝無
數小花攢大花玲瓏雕出芙蓉砂一花動至百餘
日不老須君媚歲華

後簞友篇

有序

簞友者何予之香瘦瓢也腹如椀許柄長不及
尺遊山水間輒以繫於襟帶以其與吾簞朝夕

相依故命之曰箠友錫山王子見而欲得之予
自念箠瓢窶人長物以鐘鼎與吾友可也以箠
瓢與吾友不自苦而以苦人毋乃有不堪其憂
之心乎瓢去則箠無所依又此瓢香瘦所成質
堅多節目磊砢有文與世之以匏瓠爲之者不
同予嘗有七言古詩名箠友篇志其美今復爲
後箠友篇以質王子

古之瓢飲巢與絲顏淵亦以酌溪流彼皆苦葉匏
所作短頸大腹輕且浮繫而不食經霜落腰之深
淺用亦優我之瓢與香瘦癯根之生結非香肉渣
滓已化餘皮堅黃熟未成苦面皺一柄屈折珠斗

同又如人膽剗空中就泉掐取日挹注不用羸餅
多有功一勺於我亦已足五石笑彼無所容平生
與簞作一處貧賤之交相爾汝匏瓜無匹簞其匹
中流千金吾不與未能長吸作鯨魚且復量腹爲
偃鼠所樂誰言不在茲洋洋泌水吾香糝此瓢真
是吾儔侶五嶽相攜歷寒暑中路與君恐非情使
簞無友長伶仃不及昔時太白老鷓鴣之杓同死
生簞友在君寧在我久要於義乃云可木質輕微
不足貴遺君當致一金叵

嘉禾歌爲廣州劉太守壽

昔有賢太守漁陽與潁川嘉禾麥兩岐頌聲天下

傳一莖九穗今重見我公德政誰不羨吐秀亦五
七銜滋露法法異母同穎與周同成王將復魄我
公充箱之實爲公飯上天所貺以報功父老紛紛
上堂壽持此嘉禾拜左右殷勤欲請歸禾篇家家
管絃爲公奏

惠州王太守入羅浮尋梅花村不得用子瞻
枯風亭下梅花詩原韻有作子爲和之

水簾洞口梅花村梅花不見餘冰魂美人已隨明
月沒依稀縞衣來黃昏翠羽啾嘈怨幽谷白雲黯
淡愁荒園使君苦尋千萬樹一冬衝雪忘寒溫急
須更植徧巖壑依之吐納扶桑暎盡教玉女插雲

髮復爲老人遮枯門千秋梅花作湯沐四百君當
聞此言一羅一浮再開闢花時招我傾清尊

王女
老人

二峰
名

水仙類

往年水仙從吳來四萬餘本花盡開今年祇得四
千本十本一花無重臺家家水仙苦不售一錢一
本誰買回人窮罕有好事者生理蕭條良可哀
水仙天暖但生葉天寒始得花含胎今歲廣南頗
風雪凍傷無數桃與梅水仙苦寒亦不發安得一
夜春氣迴我心望春與花似春來我心花亦開

喜寒亦喜
暖故云

琵琶行贈蒲衣子

王郎好音能琵琶千愁萬恨歸邊沙明妃紫臺作
胡語公主烏孫思漢家慷慨惟憑馬上樂淒涼豈
必軍中笳新聲鼓出好詞曲三日一調勞紅牙古
詞元人百雜劇新曲牡丹兼浣紗伯龍紅友供繁
弄酒酣一唱三咨嗟改調高彈颯風雨攢點忽似
更蝦蟆手搗口歌聲若一絲肉紛飄如飛花小聲
吹裂漆篋策大聲慘亂漁陽搥自矜琵琶與琴應
眩精駭耳非淫哇一一暉音合清濁上腔下柱同
整斜十指絕光若驚電雙袖奮影爭流霞亂擊空
中白翎雀橫奔塞上拳毛騮毛血淋漓儘揮灑又

如胡漢相紛拏大雷小雷響四逆天驚石破愁女
媧兒女呢呢不得語恩怨爾汝潛相加緩調平絃
有時倦掩抑奇態嫌窳嬰聯綿斷續轉嗚咽又如
絙瑟悲匏巴一激一昂真當泣哀歌銷盡情萌芽
鷗絃石槽兼鐵撥翻嫌古法多喧譁逢君但乞飛
龍引發揚蹈厲除姦邪鎮西更作大道曲羅襦胡
牀臨闥闢阮咸淒鏘竹林下風流豈似君瑯琊我
今煩冤神越散大招須君爲景差不然節奏盡傳
我十調五調成豪奢一枚昨致惠文婦槽用香楠
連木瓜得曹左手裴右手亦可持慰吾秦嘉琵琶
弟子君多少中有幾人顏如荼楓香定移西樓女

難帶可記楊家娃得君琵琶譜楔子顰婆舊譜寧
足誇梳山音律此一種教坊買斷傾金車王郎王
郎爾莫苦埋憂國腹如丹砂天際真人既有此北
窓跛脚殊風華

室嬖女作
姿態也

廣陵老僧聞一以畫扇見貽詩以答之

聞一善琴

老僧能琴復能畫八十四齡何蕭灑扇頭貽我蕭
湘景髣髴聞有飛泉瀉乞師卽來一鼓琴移將萬
壑寒采林霜鐘一醒青蓮耳流水長清太白心

修復浮丘詩社有作

仙城三石三培塿似三神山隨波流地道潛通第
七洞朱明門戶惟浮丘浮丘丈人昔棲此子喬吹

笙翮來遊浮丘伯與浮丘叔兄弟一羅而一浮釋
川來挹浮丘袖丹井至今如龍湫海神珊瑚一再
獻珊瑚知自珊瑚洲潑陽趙公志浮丘結大社吾越
風雅凌中州前掩曲江後海日填篋一一相綢繆
變亂以來遺響絕後生不知分歌謳抗風軒中失
領袖訶子林裏誰賡誦別裁僞體徧里巷漢唐規
矩同寇讎泰泉弟子多古調蘭汀青霞居其優我
今欲作鐘呂倡欲得二三黎與歐南園東臯總荒
艸壇坵復有浮丘不招攜諸君理蕪穢勝事更與
仙靈謀曜真之天再開闢泉源福地持咽喉三石謂浮

丘與海珠
海印也

次和惠州王子千太守初入羅浮宿冲虛觀
用東坡同子過游羅浮韻并以爲壽

朱明曜真仙人京太守入山天樂鳴洞天日月一

沐浴碧鷄紅翠生光明天教太守主雙嶽神君元

是長庚生白玉蟾真人藥市酒田暮治事琪花瑤

艸朝省畊仁愛使民盡耆壽豈徒一身聃與彭東

浮西羅恣攀陟六輪蛟蝶同身輕鮑女飛猿尚斃

蘧葛公啞虎徒猱獍鐵橋自可到銀漢玉柱何用

探金庭踏窮四百三十二一峯一峯圖且經泉源

福地置飛閣真一法酒畱丹銘金馬且復隱星宿

玉蟾豈必辭公卿冲虛玉簡多秘祝先爲蒼生求

太平

王太守作子日亭成詩以美之

泰山鷄鳴始見日羅浮夜半跋烏出南溟自是陽
明谷十日所浴光洋溢三足欲棲上下枝天鷄驚
起黑如漆珊瑚之樹卽扶桑曜靈家在鮫人室牂
牁大洋咫尺間蓬萊一股何曾失未瞰峯峯見東
君六螭先指浮山雲金光直射散飛電火輪千里
燒氤氲玄黃鷄子連珠似五色鴻濛分不分羅山
勢與浮山並見日有臺當絕頂泰山日觀高不如
俯視朱天最空迥臺風每苦扶搖多吹倒鐵橋墮
青冥重造飛亭今有誰惠陽太守才天挺鬱儀日

日朝朱明君爲東道有餘情導引重輪勤夙夜寅
賓兩珥竭神明昧爽滄涼好晞髮日華吐納變金
骨羲和爲爾再中天不使白駒過倏忽雲衣霓裳
日往來文章更與炎精發

羅浮對雪歌

庚午

嶠南自古無大雪况復羅浮火洞穴山人不識冰
與霜白露少凝陰道絕今年季冬太苦寒雪花三
尺如玉盤麻姑玉女盡頭白四百縞素失峯巒天
氣忽將南作北層冰峩峩路四塞浮碇岡頭似白
山長白羅陽溪口成勃勃千株萬株采欲摧梅花
凍死無一開北風慘吹籠蔥裂猿狖僵臥吟且哀

辟寒有方得仙客，斫取龍鱗薪琥珀。地爐燒出日
輪紅，天井迸來雲箭白。咫尺空濛接海津，光搖宮
闕失金銀。玉作越王烽火樹，瑤華飛滿珊瑚身。天
鷄夜半凍不叫，曜靈忍失朱明照。久傷烏羽墜重
光，安得燭龍銜一燭。欲挽羲車力士無，窮陰苦逼
歲華徂。麋裘不煖難消夜，坐擁瑤琴影太孤。

魚缸

魚缸景德密器大寸許，深亦如之。質瑩白，中有
魚四尾，朱色。酌酒時魚若浮游，不定。惠陽王使
君出以飲客，因爲七言古詩歌之。

天南仲秋始清涼，使君高宴飛羽觴。魚缸最小受

涓瀝以予公榮非酒狂宣成之間御密噐年來做
古多精良文淵酒魂化爲土陶家取作杯立黃鷄
缸豈如魚缸雅兼金爭購從鄱陽渤如羊脂絕瑩
白丹青不敢污中央燒出小魚類榆莢黑睛朱鬣
浮生光得酒噉啜若新水四尾相逐何洋洋生憂
噓噏魚入口合脣微飲貪聞香涵泳飛華唼浮蟻
冬甘夏苦魚先嘗缸中自是酒泉郡魚兮湯沐須
醉鄉寧圖溟渤恣潛躍一滴兩滴真濠梁失水不
憂憂失酒相濡相煦樽罍旁雲沸淵流貴不息蘭
生萼綠無參商每君飲醕似乾澤蠶蔞倏忽成滄
桑青州露甜易州辣一斟再酌蘇吾僵醇釀卽是

桃花水糟鳧亦乃鯤鵬鄉濁賢豈必清聖好北酒
誠比南醪強我欲爲魚在缸裏金鈎桂餌長無殃
一勺瓊蘇亦鯨吸纖毫不惜居魚秧五石瓠瓢拙
用大何如用小蠅螟藏蟬翼自能負嵩舉蝸角豈
必爭侯王吞舟每憂值芥葉漏網所貴同鍼芒白
小天然尚二寸入缸已是尋龍鯉我今非魴亦非
鯉酒龍變化銖黍長相隨蠖蠓遊麴蘖此樂誰知
吾蒙莊

初春六瑩堂雅集主人梁庶常出六瑩琴相

示歌以紀之

主人花多開成行入門白碧紅緋香華堂掃花燕

嘉客吳歌楚舞紛鴛鴦酒半張琴如綠綺蛇腹古
光玄雪起太冥桐幹含黃鐘髣髴落霞與流水杯
行未暇調清商點徽轉弄妨繞梁大小輦婆恐終
曲新聲靡曼娛中腸長清短側俟他日爲君一彈
歡未央

韶石歌韶州太守席上作

使君五馬從韶陽春融開讌來仙羊誇予韶石三
十六芙蓉一一摩青蒼韶陽千里盡奇石各爲根
株森相望籜龍拔地動千丈大小削成紛圓方瑤
簫玉柱千萬計排立有時如堵墻巨靈盪踏苦無
力巖巖鐵壁當中央使君拄笏韶石下氤氳紫翠

流衣裳雙峯左右接天闕二樓高下臨皇岡重華
對越儼精爽二靈髣髴非鴻荒神明沕穆合古樂
簫韶日夕探微茫南薰再鼓解民愠玉琴之外無
陶唐香鑪寶蓋試擊拊安知不可儀鳳凰無聲之
樂道所貴期君肉味長相忘

香鑪寶蓋二石
名皆韶石也

望夫石歌

二禺之峰七十二中有石人立蒼翠望夫化作石
嵯峨留取貞心在天地石公石姥洞庭西合體休
垂雙玉啼安得卽歸亦化石白雲深處長相携無
情化石石難好有情化石石難老卽歸會見石能
言招手天邊待相抱

精衛詞

西山木一日一枝銜未足口血霑濡枝忽榮化作
扶桑向暘谷扶桑枝枝有一日一日未終一日出
人間十日不妨多后羿彎弓休更彈日光倘肯照
心肝但教燒得海水乾海水乾時精衛死魂作一
金烏與日相終始

七夕後二日送王君還渠陽

惠州作

雙江合流何湯湯左江右湖城中央浮橋衝斷望
風雨遲君一日開帆檣炎雲欲散苦未散秋過七
夕方微涼平頭交扇尚揮汗解襟且復依林塘君
今拜親畱不可八千餘里歸稱觴阿兄晨羞弟夕

膳笑加七箸因芬芳紫芝老父兩眉秀白鹿仙人
雙耳長明歲能來覲叔父寶坻美酒多攜將惠陽
郡樓一再酌更看靈鵲填河梁

口占贈謝七丈長裕

羅浮七星裕曾化七道士君是第幾株蒼龍夭矯
似年今八十已大耄問汝奇齡安所底手種諸香
成水沈生結熟結多肌理贈我太古根枝枝含石
髓焚向南山鑪氤氳浸四體

質古玩行

古玩者一玉杯一玉小盤一玉鎮紙皆漢代物
也一珊瑚筆架以紫檀文具貯之副以象箸三

十矢是數物者價可不貲以空乏故倩趙生質
於押錢之家委曲求請僅得銀兩許感恨作歌
我之所玩無珍奇玉杯玉盤佳人貽珊瑚櫻桃紅
多肌以爲筆格光離離貧中往往乏名酒杯無顏
色焦羊脂象箸紛紜作一束山殽厭飫無香狸雷
驚花入紋參差血牙鮮潤徒空持饑來兒女容慘
淡堂上旨甘安所資趙生爲我鞠躬執子母錢家
求毫釐寄寶於人不越宿如託妻子懷憂疑暴棄
天物貴易賤錐刀之末終何裨韞櫝不能沽不忍
須臾割愛含酸悲况兼玉鎮雕眠獅初看絕似丹
玻璃何年出自晉靈冢蟾蜍書滴交光輝昔人殉

葬苦用此寶華吐白虹霏霏精彩溢流可照面美
人氣見春含滋血痕暗灑古花碧水巖火捺同膏
肥藐姑冰雪久滲漬萇弘朱碧爭淋漓珊瑚舊是
烽火柏趙佗鐵網千尋施一本三柯獻高帝夜光
欲然驚波斯一年始黃三年赤扒疏石上連根移
積草池中泣辭漢流落石家人不知多謝綠珠鐵
如意爲予擊碎餘一枝槎枒頗似鹿角菜珊瑚多
節仍紛披蟲食瑯玕小穿穴洞見心赤如通犀不
知珊瑚雄定雌或女珊瑚之了遺珊瑚之稅一萌
蘖尺寸亦作盤蛟螭綠沈漆鏤大小管參兩架取
隨高卑犀植象跗恹偃仰銅龍不插難傾欹門庭

免著太冲筆筆牀不用相撐支一朝爲質去書案
兎翰狐柱傷無依棲筆寢牘自今始泣別左伯兼
張芝餒在硯田耕不得鬻文爲活求者誰君苗焚
筆欲更學陳湯擲筆思乘時錯刀糞土爾何物令
我摧頽迷所爲鎚銖仰面買人子彼賤丈夫何蚩
蚩一錢羞澀笑杜老豈知百萬囊珠璣珠璣無用
化魚目泥沙拋棄空駭雞妻孥朝夕作書蠹食盡
萬卷仍長饑鮒魚只求升斗活鷄雛遑與梧桐期
嗚咽無言向珍寶臨分審視無瑕疵鮫文鵝眼多
盜鑄紺文赤仄憂吾欺但求白鏹救當厄多寡敢
望兼金齋區區長物不自保匹夫懷壁防災雁交

情所貴在終始遺簪故劍誠吾師殷勤贖汝未容
緩恐遭點辱瓊瑤姿與兒輩處患玷缺白圭再磨
終不宜紫榆文具謹扃鑰願言什襲長孳孳稍待
竭力營阿堵朱提或得微刀圭憑君完璧復歸我
被褐懷之毋遲遲

贈惠陽俞別駕

羅浮多年無主人惠陽太守今如神公與臥治同
清靜風流文采俱仙真左江右湖日拄笏訟堂無
事官長貧王祥聲名起別駕良二千石猶逡巡股
肱之郡貴公等朱轡不日閒行春芙蓉四百且登
陟葛洪鮑覲招爲鄰

插木棉

亂插木棉乘大雨無根易長珊瑚樹一枝一幹似
人長明歲花如木筆吐花比辛夷更大朶開時半
天紅似火紛紛赤玉杯爭向懷中墮拾來堆成霞
狼藉芙蓉砂苔堦掃不盡萎謝仍芬葩生長南州
盛炎德純丹表裏含光華朱顏無命易憔悴棄捐
豈敢辭泥沙

送朱上舍

汝兄嶠南來可憐故人不得相周旋臺門咫尺邈
千里相知何苦相天淵汝今又歸桐鄉去臨分那
得無纏綿嘉禾我友十餘輩汝兄第一膠漆堅管

谷已往墓木拱武功廣漢皆黃泉平生知己在梅
里白頭存者多迤邐汝行爲訊繆天自二李伯仲
應歸田徐家復有磨鏡者季也亦誠生芻賢鴛湖
一別動廿載人生倏忽真浮烟富貴非時自知隱
文章無命誰求傳戀君一步一握手賦詩金石聊
相宣汝才崢嶸亦奇闢開元大曆羞比肩參差似
兄騰笑集墳箎同開風氣先逃唐歸宋計亦得韓
蘇肯讓揮先鞭大雅只今久淪替吾衰難起黃初
前老豈爭名向輕薄自來可殺惟青蓮苦心經術
作書蠹五經縱橫情所便春秋已知非筆削大易
亦謂無方圓十翼思返仲尼舊三傳欲將公穀捐

詩歌末藝任工拙洪儒章句方拘攣壯心慷慨尚
復爾時時自苦明膏煎葛公中華倦游步龍光欲
騁聊高眠故人倘詢英霸器爲語奇雅猶芳年見

竹

哭王處士

大江以南誰狂奴故人未與何所圖長身美髯氣
虓勇叱咤可恨風雲無國亾甘作沐犢子二十有
六稱鰥夫亞匹管蕭吾亦爾英雄命苦成拘儒每
兄事君拜牀下疎巾單衣長與俱託鳳攀龍旣已
矣拂衣且先歸黃墟姿才冠絕亦何益天生我輩
填溝渠總攬國殤向地下厲鬼亦可相馳驅我今

亦是鼓刀屠老母天年哀已徂無親可事合從死
白頭下殉同啼烏哭君不脫衰經往撫棺非弔空
號呼平生慷慨共心膽悲歌往往崩玉壺君死狂
言向誰發祗應天口長喑鳴

送季子扶兩尊人靈柩歸葬錢唐

爲君歌彈歌親歿不葬哀如何桐棺暴露亦已久
越王臺下烏鳶多飛土可憐汝孝子二人封樹無
蒿里主喪未敢脫衰裳日向黃腸淚如水十數年
來栖炎方先人宅兆懷錢唐歸耐楸遂丘首精
靈相逐佳城旁崔瑗張霸闕遺令止葬豈可依他
鄉陳壽不歸遭貶斥知君及早事窀穸裂書昔感

故人心推輦今蒙誰氏力惠陽太守真申屠歸善
令公亦范式教營高燥贈多金高義雲天安有極
秋涼首路出臺關舒卷悲旌向北還如堂定築南
屏上物土依稀天竺間我昨營墳已襄事會當廬
墓長顛顛死作烏雛更斷腸生爲猿子空悲淚白
馬素車難送君微茫望斷西湖雲臯魚哭處風蕭
瑟聲亂白楊誰忍聞

題錢子濯足圖

不濯纓但濯足不見滄浪清但見滄浪濁濁可濯
兮何必清清斯受辱濁斯榮君今但濯無清濁清
濁都忘志卽平

簞亭爲颶風所摧

葵葉爲簞簞在身風吹不去長隨人簞爲亭子風
不許捲入空冥要吹汝天生葵葉作君簞汝不被
簞簞自去簞歸來兮休亂飛吾將以爾爲毛羽白
茸茸兮似鷺鷥伏蘆花兮無人知以笠爲亭無不
可吾生無分居茆茨

少穀

早黏將及秋分熟颶風吹去三分穀今歲沙田又
少收一冬祇可充餽粥耕不逢年奈命何家貧幸
未買田多空慚婦子長饑汝更使無衣帶薜蘿

去年陽月無壬子，畱寒到春寒不已。一春况復陰
雨多，凍與大冬冰雪似。諸花未見發，根荄蘭葉纔
開三四耳。荷鋤種豆且莫早，土膏雖動亦凍死。立
春不得一朝晴，今歲農夫又已矣。白頭饑餒復何
極，苦與螻蟻爭一李。於陵矯廉人盡笑，祇有辟纒
是知己。

溝壑行

嶺南三月桐未華，柳才生髮青鬢髻。縹布欲裁無
棉絮，冷淘欲作無槐芽。雨多天喬皆爛死，一春花
蘂失紅紫。水潦不憂却憂旱，春雨未應逢甲子。農
夫奔走爭祈晴，吉貝豆苗傷已矣。已過清明十餘

日苦寒尚與龍荒似餐眠誰問浣花翁一日素書
三四紙抵死饑寒不忍言甘心溝壑今如此

語云
春甲

子雨赤
地千里

食蕨

雨多蕨芽肥不已拳曲重重毛色紫一夕雷驚總
怒生莖莖看與龍頭似畚人采得兼香蕈殷勤持
向從陽市無人肯買充盤餐多爲性寒損肌理清
齋我久絕膏腴不爲逃禪學妙喜高堂往日好伊
蒲野菽山肴思所嗜肉味乾濡未忍甘薑桂相滋
今疾止雞豚無復佐晨羞蔬食從今至沒齒寸寸
春葱總斷腸枝枝冬筍休生矣

昔人食薇不食蕨食蕨能令心斷絕蕨生一一應
猿啼猿啼一聲蕨已齊千莖萬莖况雷雨一夜穿
盡春山泥猿啼多處蕨無數淚痕一一應霑汝汝
生何苦傍猿邊猿易斷腸生太苦枝枝亦是斷腸
枝下筋令人悲復悲我今無薇更可採蕨兮要汝
長療饑蕨寒薇煖薇應食薇食令人好顏色夷齊
食薇得三年不死多因蕨氣力首陽一去薇香傳
人言夷齊古薇仙薇生黃農虞夏代不生今世因
無賢我今食蕨當食蕨蕨與蕨忘無是非恍忽聞
猿啼左右思與猿同三峽歸我生與猿同性命化
爲蕨兮卽清聖斷腸久矣不須啼情返無情期得

正

猿之所在即多猿故食
能令人悲見本草

杜鵑峯作

峯乃羅
浮高頂

浮山頂上花萬千一峯花獨多杜鵑色兼藍紫與
黃者絕少殷紅猩血鮮開時無葉但枝幹槎枒屈
曲相鈎連浮山舊多海底樹豈鐵珊瑚風吹堅定
知不是子規血不然望帝成神仙春心已得丹砂
化蠶叢舊恨都棄捐謝豹亦作擣藥鳥口中長吐
瑤池蓮開多黃色得中氣與金芙蓉爭光妍西蜀
安得有此種啼痕霑濕迷荒烟斑斑臙脂自太古
那能化碧沉重泉龍爲魚兮誰不苦瀟湘之竹同
煩冤噫吁嘻瀟湘之竹真煩冤

賦爲王紫詮使君壽兼送遷任川南

使君一作羅浮君亭開子日當飛雲要與岱宗日
觀敵三更已見金烏踰南溟咫尺卽暘谷吐納不
外扶桑瞰禮接曜靈本天職朱明况與臺門鄰青
冥絕頂作雲構呼吸上通天帝欣位置豈如趙汝
馭橫翠拂楸徒紛紜白玉真人有宿契夢中相命
何諄諄仙駕長在洞天裏朝元每夜同紫宸前身
或是鶴林輩紫元紫華爲高羣不然玉局一散吏
重來髣髴驚山魘翠羽屢逢鍊冠隊青羊時開雲
篆文梅花村口勸農罷都虛坐嘯長經旬崮田無
訟鞭撻廢白衣山子皆良馴半遮水簾視公事欲

歸官閣還逡巡治行第一股肱郡鄰邦疾苦兼咨
詢薦章謂良二千石榮遷忽向瀘江濱鷺城父老
日奔走乞留緋魚豐湖滑白石爭求鮑太守荔支
寧數陳將軍黃龍諸仙亦惆悵碧雞鷄皆酸辛
啞虎將出負書麓啼猩亦欲攀車輪玉女奉餞酥
醪酒麻姑淚霑蝴蝶巾鍊橋石柱黯無色饜飴珠
玉猶嫌貧一峯一匹錦繡段四百三十愁未均爭
留大夫作生日石樓星精來老人八十九條瀑噴
薄二十四種芝輪囷玉源爲君作膏澤瑤石爲君
銘功勳丹成已堅黃金骨嬰姿孺貌長韜眞此行
劍門歷艱嶮如乘龍躡凌蒼旻舟上瞿塘利風水

旌麾高拂瑤姬裙巫山十二爲我數一峯不肯相
嶙峋定貪暮行香雨去芙蓉飛墜知橫陳天上王
郎誰識得煙霄一下嬰埃塵子晉且停白鸞鷲方
平休跨黃麒麟陰功卽是穉川藥至道惟凝姑射
神孟夏陶陶盛發育初度令節叢嘉賓安石榴吹
丹竈焰麝香萱吐華堂裊阿翁紅肌兼綠髮在家
常醉田盤春那能方朔至青鳥安得琴高來赤鱗
王喬飛舄正杳杳王陽叱馭方駢駢昔爲刺史今
岳牧神仙自來多外臣日月薄蝕要補救雲雷屯
難需經綸四海饑溺未由已百蠻痼瘵先在身夜
郎君長亦遊戲未忍鄙夷斯苗氓會將禮樂變殊

俗盡令穢緬知同倫有教豈分人獸類但舍血氣
皆尊親永寧居之亦何陋咽喉三省勞才斌諸葛
治蜀雖多猛莊躋開滇元用仁清廉得垂囊囊去
絕勝養砂成金銀代償逋賦更破產肯持南物過
峨岷脂膏毛米不濡潤斯道絕響今復振與子金
石交已定六年相對忘衣鶉但憐華采似鳩鵲未
嫌疎野同麤麕此行巴渝不借去參差兒女牽婚
姻簸弄明珠我亦得婆婆海水公無嗔終然相尋
踰白帝川南取道過金湔勉賡白鹽赤甲賦祗愁
笑破花翁唇杜陵放翁汝勅敵將來鼎峙成三分
才華絕世不入蜀爭得奇險篇篇新雄渾莽兀盡

神變要令鬼哭吾吟呻五丁在手苦開鑿天然不
露秋毫皴知君拔山筆力大此番冥搜天地根亂
揮三峽恣澎湃細寫千嶂窮氤氳錦江桃色染箋
紙遺我作草龍蝨蝨書君怪麗句千萬散爲天花
飛九垓祇恐管城不能給紫毫抽盡東郭篋

合江樓讌集次蘇長公韻

王使君出寶
坻家釀飲客

洋洋乎水何美哉合似羅浮不復開天下朋友之
膠漆安得盡似雙江來登臨風日正清美長嘯休
驚鷗鷺起使君醇醪自寶坻傾作金波逐江水一
杯明月一杯新明月笑我非仙人仙人未有不飲
者更須沉酒羅浮春

酒名

糠覈行賦贈陳子

美丈夫一身之外衣食無糠覈之肥白如玉英雄亦多冰雪膚貌如好女髮鬢美魁梧奇偉乃如此逃秦一任四衰翁興漢祇須兩孺子君今長大寧長貧且先辟穀同仙人自古王孫要饑絕壺漿豈必求交親讀書祇是學黃老陰謀實傷天地仁其間名世端不爾與君儒者元多珍

分筆行

故人遺我湘江管花紋斑駁瑯玕滿五兒分取作真書女做曹娥花露盥我日臨池學擘窠伯英弟子艸書多安得吳興真紫穎千枝揮灑換羣鶩

銀河曲

萬里銀河接鳳城，迢迢悵望不勝情。
生作仙靈偏獨宿，天公何苦累雙星。
爲天耕織辛勤絕，一年一夕還嗚咽。
誰言天上暫生離，勝似人間長死別。
人間死別又吞聲，淚逐銀河地下傾。
荷鼓有妃仍命薄，匏瓜無匹肯心平。
相隔盈盈纔一水，何如泉路數千里。
紫珪煙化綠珠沉，再見容華終已矣。
清淺河精本易乾，何須烏鵲日盤桓。
填河肯用支機石，會見橋飛勝羽翰。
將牛更飲銀河盡，天罪多情應不忍。
本是牽牛貴，莫當化爲沐犢窮。
堪憫玉手迴旋作七襄，長空日夕錦霞張。
難將綺繡償天債，皇

穹何不重文章浣紗水冷誰知汝脈脈靈仇不得
語龍鑣不解逐浮槎逃向人邊依海渚雙精曾降
黃姑地金篋劃河阻天使河名百沸至今傳牛女
有祠人盡祀竊藥嫦娥路不迷蟾兔宮中容叛妻
不聞天帝罪奔月天孫偏遣守空閨香華既有芳
祠在七夕不須鍼縷待丈夫况作館甥來帝子應
教須女代女兒乞巧且逡巡巧得蟾絲祗誤人竇
家枉有迴文妙盧女虛傳飛蓋神指間織錦稱機
絕豈是星光長照身縑素不勞分丈尺舊人爭得
白頭新自古才賢罕嘉耦生逢寡宿難消受安仁
悼儷爲姿妍諸葛求婚須貌醜而今倘欲娶姬姜

先乞雙星與年壽

草書歌贈藍公漪

公漪愛我草書好，畫成卽遣作今草。
角扇屏風總不辭，龍蛇飛動爲君掃。
古來艸聖稱張芝，神變無方吾所師。
點畫精微盡天縱，豈惟勁骨兼豐肌。
二王筆精復墨妙，思極天人無不肖。
率意超曠我亦工，研精體勢未知要。
漢人遺法久無傳，用筆從來貴極圓。
懷素頗得草三昧，夏雲隨風任盤旋。
米芾神鋒每太峻，大黃遠射力愁盡。
張旭顛草雖自然，亦傷雄壯終非晉。
我今學草常苦遲，未能變化猶矜持。
裙滑無多羊氏練，水清安得伯英池。
伯喈作

書必純素欲購千端與毫兔仲將如漆墨盈箱左
伯光妍紙無數爲君亂作一筆書心手窈冥隨所
如蛟龍拏攫恣天矯驟雨飄風教有餘穠纖折衷
更精熟每日淋漓須百幅君之散隸亦入神以之
相易須神速君有尊人艸篆精凡夫趙氏同飛名
故君法書具清識感激知已深余情筆力會當友
造化安得閉門日多暇右軍筋骨益精心與君八
分早相亞